

MEJE PO CARTE COTACAYA PABLO TATINA, TESALONICA TOMARAPIWI TATINATSI

**Meje yabara poxonaē Pablo tamropata pitaba xua tatina
pomonaetha pomonaē Tesalónica tomarapiwi**

1 ¹Xan Pablon, iru Silvano, iru Timoteo, bara poyobe pan, barapo carte pacata tinatsi. Pacata tinatsi pomonaē Tesalónica tomarapiwi pam, pomonaē panacaetutame xua wūnaē painya nejainchinexa Nacom. Paxam iru pomonaē pejume cowūntsi jiwi pam, pomonaē painya neyawa jinompaewi Nacom, pon Waxa. Matauta paxam pomonaē xua painya neyawa jinompaewi Jesucristo, pon jiwi Pecanamataxeinaein. ²Barabu Nacom, Waxa, iru Jesucristo, pon jiwi Pecanamataxeinaein, paca yawenaena pia paca necaantobewaxae xua jūntu coyene weiweinaya painya nejinompaewa tsane. Matautano barabu betiya xanepanaya jūntemiya jinompa paca cana exanaena.

**Meje yabara xua poxonaē Nacom yabara paebina jiwi xua penatsicuentsiwa
xua abe peexanaexae poxonaē Cristo equeicha patopaetsica**

³Patamonaē pam paxam pomonaē iru painya nejume cowūntsi jiwixae Jesucristo. Bewa pacata wūcaponeibinchi Nacom, xua pata jei tsaibiwa: “Nacom maisa pajūntu weiweinan xua Tesalónica tomarapiwi beta xanepanaya cajume cowūnta”, xua pata jei tsaibiwa tsane Nacomtha. Baxua painta wūnaē xua paexanan, tsipei equeicha matowa mataropeichiya pajume cocowūntaponame. Matautano equeicha matowa nantiya pana naantobem tsoponaem xua daxita paxam. ⁴Daxota jūntu coyene weiweinaya paca yabara paebatsi Nacom piamonaetha xua ichamonaē matabuxu. Paca yabara jeichi: “Maisa Tesalónica tomarapiwi jume cowūnta beta, yawa saya beta dubenanaebiya poxonaē bequein atene exanatsi abeya peyabara paebeibixaetsi ichamonaē. Matautano

barapomonaē beta exana dubenanaēbiya xua bequein atene exanatsi xua poxonae ichamonae abe peexaneibixaetsi”, paca yabara jeichi barapomonaetha. ⁵Baxuan tsita itapeinya xeina xua poxonae bequein Nacom yabara paeba jiwi xua penatsicuentsiwa yawa peraxa jubitha barapo jiwi, barapara xanepanaya exana. Tsipei barapo jiwi natsicuenta Nacomtha abe peexanaexae. Daxota Nacom bara paca yabara cui copata xua painya patsinexa pia peitorobi nacua beicha tatsi, tsipei bichocono paatenem painya nejume cowuntsixaem bapon.

⁶Pomonaē xua paca atene exana, bexa tsane Nacom xuya cana exanaena xua barapomonaē peraxa jubinchi. Barapara Nacom baxua beta exana pia abe pacata exanaexae barapomonaē. ⁷Nacom paca nafifina capanenebiya exanaena xua paca yabara cui opi ducua exanaena xua ichamonae atene paca exana. Irur̄ paxantha barichi tsane Nacom, xua poxonae Jesús patopaetsica, pon jiwi Pecanamataxeinaein. Bapon Jesús bar̄ patopeicaena pia matatsunpiwi, xua matatsunpiwi peayapus̄watha patsicaena. Matautano Jesús muxuna patopeicaena pexeinya peitupanae coicha xua be isoto. ⁸Jesús patopaetsica xua atene peexanaenexa jiwitha abe peexanaexae pomonaē jopa yaputaeyo Nacom, penaitematsixaetsi. Matautano atene exanaeinchi pomonaē jopa jume cowuntsiyo Jesús pia pecapanenebiyae jume diwesi tatsi, pon Wanacanamataxeinaein. ⁹Barapo jiwi ataya tsitecaeya ajuntucoyenetane tsane tsana penobixae tsainchi taj̄ beya xua bapon pon jiwi Pecanamataxeinaein pia xainya weya tatsi. Matautano barapo jiwi jopa tae tsane pon jiwi Pecanamataxeinaein pia pexeinya peitupanae coicha tatsi, xuano xua pia peayapus̄ itorobiwa tatsi xua bichocono pexeinya coyene. ¹⁰Baxuan Nacom exanaena po matabitha ab̄ poxonae patopeicaena pon jiwi Pecanamataxeinaein, xua daxita piamonaē pebar̄ cui itura jinaenexa tsainchi. Matautano bapon daxita piamonaē nabenaecaeya w̄nae jainchinchi pomonaē pejume cowuntsiwichixaetsi. Paxam bara paichim tsane barapo matabitha painya nejume cowuntsixaemxae po diwesi jume bayatha paca tsipaebatsi.

¹¹Daxota ataya paca yabara w̄queibatsi Nacomtha. Pajan: “Nacom yawende barapomonaē xua jinompaena po coyeneya icha xua xam ichichipame poxonae w̄n dubame barapomonaē xua penaexanaenexa jinyamonaē. Matautano yawende barapomonaē pewetsinexa tsane jinya neayapus̄ itorobi coyenewatha po coyene xua w̄nae, po coyene barapomonaē ichichipa xua peexanaewa. Matautano yawende barapomonaē pewetsinexa po penacuichiwa exana necajume cowuntsixae”, pajan Nacomtha. ¹²Icha beta pajinompame, jiwi w̄nae jainchina Jesús, pon Wanacanamataxeinaein, painya nejume cowuntsixae tsane bapontha. Matautano Jesús cana exana xua barapo jiwi w̄nae paca jainchina painya paca cataexae tsane xua Nacom paca yawena, pia

paca necaantobewaxae, xuano xua Jesucristo paca yawenaru pia paca necaantobewaxae pon jiwi Pecanamataxeinaein.

Meje yabara xua equeicha patopaetsica pon jiwi Pecanamataxeinaein

2 ¹Patamonae pam, anoxuae nama yabara bepaca tsipaebinchi xua Jesucristo, pon Wanacanamataxeinaein, equeicha pepatopaewa tsica. Matautano ichichipan yabara xua tapaca tsipaebiwatsi xua wanaca baru nacaetutsiwa bapon. Daxota jume daunweya paca tsipaebatsi baxua. ²Icha ichamonae paca tsipaeba xua pinae anoxuae matabi jopa, po mataqueitha xua Jesucristo, pon jiwi Pecanamataxeinaein bayatha patopa, painya xoba bepijawa payabara najuntu coyene cabenaecaename xua daxota jopa beta pananta xeinaem. Jopa bichoina payabara jume cowuntsinde bequein paebitha tsane xua pinae baxua barapomonae tsipaebatsi Nacom pia Pejumope tunaxu tatsi. Matautano painya xoba payabara jume cowuntame bequein paebitha tsane xua pinae baraxua yabara paebandu. Matautano painya xoba payabara jume cowuntame bequein paebitha tsane xua pinae barapomonaetha baraxua payabara tinandu. ³Jopa pacopatsinde xua ichamonae yabara paca muxitoroba baxua bequein pinmonae paca tsipaebitha tsane baxua. Tsipei baxua pewunaeya tsane xua poxonae barapo matabi jopaena, bewa matha patopaena xua po coyene jiwi Nacom naitematnchi. Bapoxonae pebin patopaena pon bichocono jopa juniya abe exanaeyo. Bapon apara pon Nacom weraweraca exana isototha po isototha bapana cuinaya jopa ataya tsitecaeya itacounayiyo. ⁴Bapon Nacom abe yabara paebinchi. Bapon jopa tsita ainya cuiyo tsainchi daxita pocotsiwa jiwi wuna jainta. Matautano bapon jopa tsita ainya cuiyo tsainchi bequein po nacomun jiwi exana. Bapon pia coutha penacanamataxeinaein naexana xua peewatsiwa daxita pocotsiwan Nacom piawa, xua pia wuna jaintichi, xua jiwi wuna jainchina. Matauta bapon ecaena Nacom pin pia botha xua pia coya Nacom najainta.

⁵iBara baxuan yabara caena bayatha paca tsipaebatsiba poxonae cataunxuae paca baru popoinchi! iBara pajuntemainame jampa?
⁶Anoxuae paxam payabara yaputaneme po coyene xua peayapusu itorobi coyenewa bapon cui matawentatsi xua pepatopaewa. Saya beya jame patopaetsica poxonae barapo matabi tsane xua bapon copatinchi xua pepatopaewa tsica tsane. ⁷Pinmonae anoxuae bichocono abe exanapona. Saya waxainchi yabara yputaenchi baxua Nacom pia wanaca yputane exanaexae wajume cowuntsixae. Nama pomonae jopa jume cowuntsiyo jopa yabara yputaeyo baxua. Saya meisa acoibi xua pitinchi pon xeina barapo peayapusu itorobi coyenewa xua pecui matawentsiwatsi pontha pon bichocono abe peexanaein. ⁸Saya bapoxonae naitutsina bapon pon bichocono abe peexanaein. Ichitha poxonae Jesús, pon jiwi

Pecanamataxeinaein patopaetsica, bapon bexubina pon bichocono abe peexanaein bexubinchi poxonae ofutarabina, xua ataya weraweraca pecana exanaenexa pexeinya peitupanae coicha peyawa naitutsiya patopeicaexae tsane. ⁹Pewunaeaya tsane xua poxonae Jesús bexubina pontha pon bichocono abe peexanaein, Satanás pon caurimonae pia pentacaponaein tatsi, bapontha catsina pia peayapusu itorobi coyenewa xua catinchi pon abe peexanaein. Bapon pon bichocono abe peexanaein bichocono peayapusuwa yawa patopaena. Matautano bapon daxita coyeneintha pexeinya petsita itubiwana exanaena peayapusuwatha xua jopa xainyeyo xua jiwi pemuxujainyabinexatsi. ¹⁰Bapon exanaena daxita peabe coyenewan xua daxita jiwi pemuxujainyabinexa tsainchi. Nacom exanaena xua barapo jiwi weraweracaena jopa peichichipaexae xua pejume cowuntsiwa pexainyei jume diwesi po diwesi xua barapomonae pecapanenebiyaenexa tsainchi. ¹¹Daxita barapo coyeneinxae daxota Nacom bara saya yabara cui copata xua barapo jiwi bara muxujainyabinchi xua daxota jume cowuntsina barapo penaerabi diwesi jume. ¹²Pomonae jopa bejume cowuntsiyo pexainyei diwesi jume barapomonae saya ichichipa nawita xua peabe coyenewan exana. Barapomonae Nacom caununaya itawetsina poxonae yabara paebina xua barapomonae Nacom tsita natsicuentatsi xua abe peexanaexae.

Meje yabara pomonae Nacom itapeta pecapanenebiyaewa tsane

¹³Patamonae pam, paxam pomonae pam pomonae paca antobe pon jiwi Pecanamataxeinaein. Paxan bewa daxita matakabi pacata wuqueibinchi Nacomtha. Bewa pajan tsaibin tsane: “Nacom maisa pajuntu coyene weiweinan beta necajume cowuntsixae Tesalónica tomarapiwi”, bewa pajan tsaibin tsane. Daxota baxua papaeban Nacomtha tsipei bayatha caena paca itapeta painya nepaca capanenebiyaenexa xua tsiwanaya poxonae aena Nacom forota barapo cae pin nacuathe. Nacom baxua exana pia peayapusuwatha po peayapusuwa pia Pejumope tunaxu tatsi xeina ponxae paca juntu coyene xanepana exana Nacom nexa. Matautano baxua exana poxoru painya nejume cowuntsixae pexainyei diwesi jume. ¹⁴Daxota Nacom bayatha paca waba bapon painya nejume cowuntsinexa poxonae paca cuidubatsi Nacom pia pecapanenebiyae diwesi jume. Daxotano paca waba xua Jesucristo pon Wanacanamataxeinaein painya nenabarū xeinaenexa pia pexeinya peitupanae coyenewan.

¹⁵Patamonae, daxota pajume cowunta dubenanaebiyama equeicha matowa. Painya xoba pajuntemainame po pecuidubiwan xua ichamonae pana cuiduba xua xuya anoxuae yatsicaewa paca cuidubatsi, xua yawa cartano pacata tinatsi. ¹⁶⁻¹⁷Nacom Waxa, pia wanaca antobexae naca yawena. Bapon ataya tsitecaeya naca matateica pia pexeinya juntu coyenewatha. Matautano Nacom naca cata xua wawuna

ewatsiwa pocotsiwa xua bapon naca catapaeba, pocotsiwa xua wūnae. Paca yabara paebatsi bapontha. Matautano paca yabara paebatsi Jesucristotha pon Wanacanamataxeinaein. Pajan baponbetha: “Barabu payawenaenamebe Tesalónica tomarapiwi. Barabu pajuntũ coyene cui tsacabinamebe barapomona. Matautano barabu juntũ coyene jume cowũntsiya ayapusũya pacana exanaenamebe barapomonaetha, xua pia pepaebibinexa pocotsiwa wūnae xuano pia peexaneibinexa pocotsiwa xanepana”, pajan baponbetha.

Meje yabara poxona Pablo namchi: “Painta Nacomtha wūcare”, jei

3 ¹Patamona, paxam pomona pam pomona irũ painya nejume cowũntsixae Nacom. Anoxuae paca tsipaebatsi pocotsiwa xua pawetan xua pata paca tsipaebiwatsi. Paca jeichi xua painta Nacomtha wūcare xua xain pon jiwi Pecanamataxeinaein pejume diwesi tatsi awiya nainya tajũ patsipaebaponaein daxita nacuantha. Matautano painta wūcare xua xain ichaxota patsipaeban barapo diwesi daxita jiwi beta jume barũ jejei peainya cui diwesixae, icha paichim poxona pajume taneme barapo diwesi. ²Matautano Nacom painta wūcare xua xain Nacom jopa copatsiyo xua painta abe exana pomona bichocono ajuntũcoyenebe. Tsipei jopa daxita jiwiyo pomona beta jume cowũnta po diwesi patsipaeban. ³Ichitha jame bara ita coxoinchi xua wajume cowũntsiwa pon jiwi Pecanamataxeinaein tsipei bara bapon xainyeya naca yawena. Matautano bapon paca juntũ ayapusũya exanaena. Matautano bapon paca ita ararana xua abe paca exanaeyainwa pon bichocono abe peexaneibin. Paca yawenaena xua jopa painya neexanaenexa abe peexanae cuiru coyenewan. ⁴Bara paca yabara jume cowũntatsi xua bara bapon pon jiwi Pecanamataxeinaein paca yawena. Bapon paca yawenaena xua paexaname, xuano xua paexana dubenanaebiyaename pocotsiwan xua paca itorobatsi. ⁵Barabu bapon pon jiwi Pecanamataxeinaein, paca yawenaena xua bichocono painya neyabara yaputaenexa Nacom pia paca antobe coyenewa tatsi. Matautano barabu paca yawenaena xua awiya antũcoyenesũya painya nejume cowũnta dubenanaebiyaenexa tsane. Bapoxona bequein ichamona abe pacata exanaetha tsane jopa paaitaconaem tsane. Bara paichim tsane icha Cristo ichi xua poxona jiwi barapocotsi coyene exana jopa aitaconayo.

Meje yabara poxona Pablo yabara paeba xua jiwi bewa nacuichina

⁶Patamona pam, paca itorobatsi tsipei Jesucristo Wanacanamataxeinaein pana cata pia peitorobi coyenewa. Painya xoba imoxoyo pabarũ jinompame peafaetabi jiwi pomona aichaxaibi nacuita, xua pomona irũ pejume cowũntsiwixae. Barapomona jopa yabara jume

cuiya exanaeyo po pecuidubi coyenein xua Jesucristo weya bayatha, xuano xuya barapomonaetha pacuiduban. ⁷Paxam payaputaneme, xua bewa xanepanaya betiya pajinompaem, icha bayatha paichin. Poxonae paca baru jinompatsi jopa paacoyenefaetabinyo, apara panacuitan nawita. ⁸Poxonae paxaiban painya xantha bara pentoma paexaneiban pexaewa nexa. Jopa amanaya panabaneibinyo. Jame apara daunweya panacuiteiban merawintha matacabinthano xua jopa daunweya pata pacata exanaewatsi tsainchi. Jopa panantawenonaem xua painta comocame pexaewa. ⁹Bequein pana yabara cui copata xua pata paca wucaewatsi pata neyawenaenexam tsane, ichitha bara pana netaneme xua pexaewa pana natsiupain nacuitan, xua iru bara painya neichinexaru. ¹⁰Tsipei poxonae paca baru enatsi baxua yabara paca tsipaebatsi xua barapo peitorobiwe paca jeiche: “Pon jopa benacuichiyo bu jopa xae tsane”, paca jeiche. ¹¹Ichamonae pana tsipaeba xua painyamonaе jiwana yabara, xua pinae painyamonaе jiwana jopa natsiupain nacuichiyo pexaewa. Saya pinae dubenanaebiya. Barapomonaе saya pinae ichamonae yabara yuyujeichi. Barapomonaе jopa pinae exanaeyo piawa. Saya pinae penabaruruyujei poxonae ichamonae eneibatsi poxonae nacuiteiba. ¹²Barapomonaе pomonaе saya dubenanaebiya, paitoroban pajanje: “Tsipei Jesucristo pana cata pia peitorobi coyenewa pon jiwi Pecanamataxeinaein, daxota pecono jumeyotha paca tsipaebatsi. Bara panacuire painya nenacuichiwa xua pexaewa painya natsiupain nacuichinexa. Jopa ichamonae payabara nabaru yuyujande”, pajanje. ¹³Ichitha paxam patamonae pam, pomonaе pam iru pajume cowuntame jopa paajuntucoyenefaetabinde xua xanepanaya painya neexanaewam. Awiya xanepanaya paexanaponde. ¹⁴Icha ichun painyamonaе jiwana jiton jopa exanaeyo pocotsiwa paca tsipaebiya tinatsi barapo cartathe barapo pebin pacui naitaeware painya necui yaputaenexa. Barapo pebin jopa pabarurujinompaeinde, xain bapoxonae aura xua jopa peexanaexae xua barapo cartathe papaeban. ¹⁵Ichitha jopa bapon pacana exanaeinde be pon painya nepaca caaitafaetabi jiton. Saya jame maisa pamuxuwere xua bapon maisa penacuichinexa. Matauta maisa bapon patsipaebare icha paichim poxonae patsipaebame pontha pon pejume cowuntsin.

Meje yabara xua Pablo najume wetsiya paeba

¹⁶Jesucristo pon jiwi Pecanamataxeinaein xua juntema popona peyacuiya jinaein, bu bara barapo juntema pejinompae coyene paca catsina daxita matacabin tsaibi poxonae bequein ichamonae abe pacata exaneiba. Barabu bapon pon jiwi Pecanamataxeinaeinxae daxita paxam paca barurujinompaeina.

¹⁷Xan Pablon saya meisa barapo couye tacoutha bara tinan, po jumeyo xua paca jacobatsi. Baxua tsita itapeinya xeinan xua barapo carte apara

bara tacarta. Daxita tacartantha barapo jume couxi wetsiya tineiban
icha barapo carte ichi. ¹⁸Pon Wanacanamataxeinaein, Jesucristo, barabũ
daxita paxam bichocono paca yawenaena pia paca antobexae.

Baja Pablo, irũ Silvano, irũ Timoteono ponbe necueyatabe.